

## Inatsisissatut siunnersuummut oqaaseqaatit

### Oqaaseqaatit nalinginnaasut

#### 1. Aallaqqaasiut

Kalaallit Nunaanni pinerluttulerinermi inatsimmi kapitali 33-mi aalajangersakkat malillugit, eqqartuussut eqqartuussiviulluunniit aalajangeereernerata kingorna inunnet innarluutilinnut Kalaallit Nunaanni ulloq unnuarlu neqeroorummut inissinneqarsimasunut akiliunneqarluni tikeraarluni angalasinnaatitaanerit atuutissannginnerat siunnersuutip erseqqissaavigissallugu siunertaraa.

#### 2. Siunnersuummi pingaarnertut immikkoortut

Inuit innarluutillit tapersorneqarnissaannut Inatsisartut inatsisaat nr. 13, 12. juni 2019-imeersuummi §§ 54 aamma 55-imi aalajangersakkat allanngortinneqarnissaannik siunnersuut manna imaqarpoq.

Inuit innarluutillit tapersorneqarnissaannut inatsimmi § 54 malillugu inuk innarluutilik 18-it sinnerlugit ukioqartoq, inuk pineqartoq Kalaallit Nunaanni nunagisami avataani ulloq unnuarlu neqeroorummi najugaqarpat, nunagisaminut ukiumut ataasiarluni akiliunneqarluni tikeraarluni angalasinnaatitaavoq. Kommunalbestyrelsip neqerooruteqarnera malillugu inuit Danmarkimi ulloq unnuarlu neqeroorummi najugaqartut 2-nik pisinnaatitaapput.

Inuit innarluutillit tapersorneqarnissaannut inatsimmi § 55-imi pissutsit taakku aamma atuupput, tassani meeqqat innarluutillit ukiumut marloriarlutik akiliunneqarlutik tikeraarlutik angalasinnaatitaallutik.

Pinerluttulerinermi inatsit malillugu eqqartuussaasunut Danmarkimi ulloq unnuarlu neqeroorummi inissinneqarsimasunut tamatuma assigisaa atuutinngilaq. Uani tikeraarluni angalanissanut pisinnaatitaaffeqartoqanngilaq, pissutigalugu inuit innarluutillit tapersorneqarnissaannut inatsimmi § 54, imm. 3-mi aamma § 55, imm. 3-mi immikkut ittumik § 49, imm. 2-mut innersuussisoqarmat, tassanilu inuit kommunalbestyrelsimit Kalaallit Nunaata avataani inissinneqarsimasut taamaallaat pineqartut takuneqarsinnaavoq. Unerluussisussaataitasut tassaapput eqqartuussap anisinnaaneranut aamma qaqugukkut anisinnaaneranut aalajangiinissamut piginnaatitaasut, aamma tamanna tunngavigalugu, tikeraarluni angalasinnaatitaanerit, anisinnaatitaanermik pisinnaatitaaffeqarnermik naatsorsuuteqarfiusut, pillugit Inatsisartut inatsisaanni aalajangersakkanit aalajangersarneqarsinnaanngillat.

Tamatuma peqatigisaanik pinerluttulerinermi inatsit malillugu inunnet najugaqarfissatut neqeroorutini Danmarkimiittuni najugaqartunut tikeraarluni angalanerit pillugit aalajangersakkat, pisut ilaanni kukkusumik nassuiarneqartarsimasut sulisaatsit takutippaat. Inuit eqqartuussut imaluunniit tamanna pillugu eqqartuussiviup aalajangiinerata kingorna

Danmarkimi inissineqarsimasut, pisut ilaanni, naak inatsisitigut tunngavissaqanngikkaluartoq, akiliunneqarlutik tikeraarlutik angalatinneqartarsimasut tamatuma kinguneraa.

Inummit, eqqartuussut malillugu Danmarkimi najugaqarfissatut neqeroorummi inissineqarsimasumit, tikeraarluni angalanissamik qinnuteqaammut kommunalbestyrelsip itigartitsissutaa, Isumaginninnermi Naammagittaalliuuteqartarfiup ilalerlugu 2019-imi juunip 19.-ani aalajangiiffigaa. Tikeraarluni angalasinnaatitaaneq inunnut kommunalbestyrelsip imaluunniit Naalakkersuisut tamanna pillugu aalajangiinerat tunngavigalugu nunagisap avataanut inissineqarsimasunut taamaallaat atuunnera, aamma inuup pineqartup eqqartuussut malillugu ulloq unnuarlu paaqqinnittarfimmut inissineqarsimanera, Isumaginninnermi Naammagittaalliuuteqarfiup aalajangiinnerminut tunngavilersuutigaa.

Akiliunneqarluni tikeraarluni angalasinnaatitaanerit inunnut innarluutilinnut 18-it sinnerlugit ukiulinnut meeqqanullu innarluutilinnut eqqartuussut eqqartuussiviulluunniit tamanna pillugu aalajangeereernerata kingorna ulloq unnuarlu neqeroorummi inissineqarsimasunut atuutissannginnerata erseqqissarneqarnissaa siunnersuummi matumani siunertarineqarpoq. Inunnut taakkununngaqqissaaq taamaallaat siunnersuut una akornngusiivoq. Kommunalbestyrelsimit ulloq unnuarlu neqeroorummut innersuussineq tunngavigalugu inuit innarluutillit 18-it sinnerlugit ukioqartut meeqqallu innarluutillit tikeraarlutik angalasinnaatitaanerit taamaattumik ullumit tamakkiisumik atuutiinnassaaq.

### **3. Pisortanut aningaasaqarnikkut allaffissornikkullu kingunissai**

Pisortanut aningaasaqarnikkut allaffissornikkulluunniit taasariaqartumik kinguneqartussaannngitsutut siunnersuut nalilerneqarpoq.

### **4. Inuussutissarsiortunut aningaasaqarnikkut allaffissornikkullu kingunissai**

Inuussutissarsiortunut aningaasaqarnikkut allaffissornikkullu siunnersuut kinguneqassanngilaq.

### **5. Avatangiisinut, pinngortitamut inuillu peqqissusaannut kingunissai**

Avatangiisinut, pinngortitamut inuillu peqqissusaannut siunnersuut sunniuteqassanngilaq.

### **6. Innuttaasunut kingunissaa**

Inunnut innarluutilinnut ikittunnguanut eqqartuussut eqqartuussiviulluunniit tamanna pillugu aalajangeereerneratigut ulloq unnuarlu neqeroorummi najugaqartinneqartunut, tikeraarluni angalasinnaaneq pillugu siunnersuut akornngusiissaaq, inuilli innarluutillit kommunalbestyrelsimit ulloq unnuarlu neqeroorummut innersuunneqarsimasut tikeraarlutik angalasinnaanerit allanngortinneqassanngilaq.

### **7. Siunnersuutip kingunerisinnaasai pingaarutillit allat**

Siunnersuut allanik pingaarutilinnik kinguneqanngilaq.

## **8. Tusarniaaneq**

Siunnersuut piffissami 2020-imi 8. decembarimiit 2021-imi 4. jannuaarimut [www.naalakkersuisut.gl-mi](http://www.naalakkersuisut.gl-mi) tusarniaanernut quppersakkami tamanut saqqummiunneqarsimavoq, aamma tamatuma peqatigisaanik tusarniaavigisartakkanut arlaqartunut tusarniutigineqarsimalluni. Tusarniaaneq pillugu ilanngussa 2 innersuussutigineqarpoq.

## **Siunnersuummi aalajangersakkanut ataasiakkaanut oqaaseqaatit**

### *§ 1-imut*

Nr. 1

§ 54, imm. 1-imut

Inuk innarluutilik 18-it sinnerlugit ukioqartoq najugaqatigiiffimmi, najugaqarfimmi illersugaasumi imaluunniit ulloq unnuarlu neqeroorummi nunagisami avataani, imaappoq illoqarfigisami nunaqarfigisamiluunniit avataani, najugaqartoq ukiumut ataasiarluni nunagisaminut tikeraarluni angalanissamut imm. 1-ip malitsigisaanik akiliunneqarsinnaatitaavoq.

Inuup nunagisami avataani najugallip nunaminut atassuteqarnerata attatiinnarnissaanut ikiorneqarnissaa aalajangersakkap siunertaraa. Nunagisamik oqaraanni inuup innarluuteqartup najugaqarfimmi neqeroorummi najugaqalinnginnerani illoqarfik nunaqarfilluunniit nunagisimasaa tunngaviusumik innersuussutigineqarpoq.

Pissutsit allat, inuup innarluuteqartup inuttut attaveqarfii ilanngullugit, naliliinermi ilanngunneqarsinnaapput. Assersuutigalugu inuup innarluuteqartup qanigisai nunagisimasaq qimallugu nuussimasinnaapput. Taamaattoqartillugu qanigisaasut najugaqarfigilersimasaannut tikeraarluni angalatitsisoqarsinnaavoq, taamaalilluni pitsaanerpaamik qanigisanut attaveqarneq sapinngisamik qulakkeerneqassammat. Qanigisatut nalinginnaasumik isigineqartarput katissimasaq, angajoqqaat, qatanngutit, aanaa/aataa, angajoqqaarsiat allallu inummut qanittumik attaveqartut.

Nr. 2

§ 54, imm. 6-imut

Inuup innarluutillip 18-it sinnerlugit ukioqartup Kalaallit Nunaanni pinerluttulerinermi inatsimmi kapitali 33-mi aalajangersakkat malillugit, inuk eqqartuussut eqqartuussiviulluunniit aalajangeereernerata kingorna ulloq unnuarlu neqeroorummiittussanngortinneqarsimappat imm. 1-4 malillugit akiliunneqarluni tikeraarluni angalasinnaatitaanera atuutissanngitsoq imm. 6-ip malitsigaa.

Nr. 3

§ 55, imm. 6-imut

Meeqqap Kalaallit Nunaanni pinerluttulerinermi inatsimmi kapitali 33-mi aalajangersakkat malillugit, eqqartuussut eqqartuussiviulluunniit tamanna pillugu aalajangeereernerata malillugu ulloq unnuarlu neqeroorummiittussanngortinneqarsimappat meeqqap innarluutillip akiliunneqarluni tikeraarluni angalasinnaatitaanera atortinneqassanngilaq imm. 6-ip malitsigaa.

*§ 2-mut*

2022-imi ulloq 1. januar siunnersuutip atuutilernissaa siunnersuutigineqarpoq.

<b>Inatsisissatut siunnersuutip inatsimmut atuuttumut assersuunera</b>	
<i>Oqaaseqatigiit atuuttut</i>	<i>Inatsisissatut siunnersuut</i>
	<b>§ 1</b>  Inuit innarluutillit tapersersorneqarnissaannut Inatsisartut inatsisaanni nr. 13, 12. juni 2019-imeersumi makkuninnga allannguuteqassaaq:
<p><b>§ 54, imm. 1</b>  <b>§ 54.</b> Inuk innarluutilik 18-it sinnerlugit            ukiulik nunagisaminut ukiumut ataasiarluni            akiliunneqarluni tikeraarluni            angalasinnaatitaavoq, piumasaqaatit makkua            naammassineqarsimappata, taamaattoq            takuuk imm. 3 aamma 4:            1) inuk § 13 malillugu            najugaqaqatigiiffimmiippat, § 14 malillugu            najugaqarfimmi illersugaasumiippat,            imaluunniit § 18 malillugu ulloq unnuarlu            neqeroorummiippat, aamma            2) najugaqarfissatut neqeroorut inuup            nunagisaata avataani inissisimappat.</p>	<p><b>1.</b> § 54, imm. 1, ima oqaasertaqalissaaq:            ” Inuk innarluutilik 18-it sinnerlugit ukiulik            nunagisaminut ukiumut ataasiarluni            akiliunneqarluni tikeraarluni            angalasinnaatitaavoq, piumasaqaatit makkua            naammassineqarsimappata, taamaattoq            takuuk imm. 3, 4 aamma 6:            1) inuk § 13 malillugu            najugaqaqatigiiffimmiippat, § 14 malillugu            najugaqarfimmi illersugaasumiippat,            imaluunniit § 18 malillugu ulloq unnuarlu            neqeroorummiippat, aamma            2) najugaqarfissatut neqeroorut inuup            nunagisaata avataani inissisimappat.”</p>
	<p><b>2.</b> § 54-imi imm. 5 immikkoortutut nutaatut            ilanngunneqassaaq:            ” <i>Imm. 6.</i> Imm. 1-4 malillugit tikeraarluni            angalasinnaatitaanerit, eqqartuussut            eqqartuussiviulluunniit tamanna pillugu            aalajangererata kingorna, inunnut            innarluutilinnut ulloq unnuarlu            neqeroorummi inissinneqarsimasunut            atortinneqarsinnaanngillat.”</p>
	<p><b>3.</b> § 55-imi imm. 5-ip kingorna            immikkoortoq nutaaq ilanngunneqassaaq:            ” <i>Imm. 6.</i> Imm. 1-4 malillugit tikeraarluni            angalasinnaatitaanerit, eqqartuussut            eqqartuussiviulluunniit tamanna pillugu</p>

	aalajangerata kingorna meeqqanut innarluutilinnut ulloq unnuarlu neqeroorummi inissineqarsimasunut atortinneqarsinnaangillat.”
	<b>§ 2</b> Inatsisartut inatsisaat ulloq 1. januaari 2022 atuutilissaaq.

**Tusarniaaneq**

Siunnersuut piffissami tusarniaaffiusumi tusarniaavigisartakkanut tulliuttunut tusarniutigineqarpoq:

Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, Nunatsinni Eqqartuussivik, Kalaallit Nunaanni Politiit, Kalaallit Nunaanni Pinerluttunik Isumaginnittut, Nunatsinni Advokatit, Nunatta Illersuisuunera, Inuit Pisinnaatitaaffii pillugit Siunnersuisoqatigiit, Dansk Institut for Menneskerettigheder, Naligiissitaanermut Siunnersuisoqatigiit, Isumaginninnermi naammagittaalliuuteqartarfik, Meeqqat Oqaaseqartartut MIO, Inuit Innarluutillit Illersuisuat Tilioq, Pissassarfik – Inunnut Innarluutilinnut Sullissivik, Peqatigiiffik Kalaallit Meerartaat, MIBB (Meeqqat Inuunerissut), Sorlak (Kalaallit Nunaanni Meeqqat Inuusuttullu Siunnersuisoqatigiiffiat), NanuBørn, Isumassortit (Angerlarsimaffiit namminersortut kattuffiat), Nunatsinni Inuit Innarluutillit Kattuffiat, KNIPK, (Kalaallit Nunaanni Innarluutillit Piginnaanikitsullu Kattuffiat), ISI (Kalaallit Nunaanni tappiitsut isigiarsuttullu peqatigiiffiat), KTK (Kalaallit Nunaanni tusilartut kattuffiat), Sugisag (Tarnikkut eqqarsartaatsikkullu napparsimasut ilaquataasullu peqatigiiffiat, Landsforeningen Autisme, kreds Grønland, Inooqat (Kalaallit Nunaanni ineriartornermikkut akornutillit angajoqqaavisa peqatigiiffiat), Angajoqqaatigiit (Angajoqqaat ADHD-ertunik autismeqartunillu meerallit peqatigiiffiat), NIISIP (Nunatsinni inunnik isumaginninnermi siunnersortit ilinniarsimasut peqatigiiffiat), Peqqissaasut Kattuffiat.

**Tusarniaanermi ukua akissuteqarsimapput:**

Kommuneqarfik Sermersooq, Qeqqata Kommunia, Meeqqat illersuisuat /MIO, Institut for Menneskerettigheder, KNIPK, Sulisitsisut aamma Kalaallit Nunaanni Politiit.

Tusarniaanermi akissutit tamakkerlugit ilanngunneqarput naalackersuisoqarfiup akissutai uingasunngorlugit allassimallutik.

**Kommuneqarfik Sermersooq**

”Suliffeqarnermut Isumaginninnermullu Ingerlatsiviup allannguutissatut siunnersuut tamakkiisumik tapersersorpaat. Tikeraarluni angalasinnaatitaanerup ersarissarneqarnera naleqquppoq.

Suliffeqarnermut Isumaginninnermullu Ingerlatsivik ataatsimik oqaasissaqarpoq. Inuit innarluutillit tapersersorneqarnissaannut Inatsisartut inatsisaanni nr. 13, 12. juni 2019-imeersumi § 55, imm. 6-imi aalajangersimasumik oqaasertaliineq Meeqqat tapersersorneqarnissaannut Inatsisartut inatsisaanni nr. 20, 26. juni 2017-imeersumi § 36, imm. 2-mi assinganik meeqqanut inissinneqarsimasunut tikeraarluni angalarnermut tunngatillugu ersarissaasoqassanersoq eqqarsaatigineqartariaqarpoq.”

*Akissut: Naalackersuisut Meeqqat taperserneqarnissaannut Inatsisartut inatsisaata allanngortinneqarnissaanik siunnersuusioreerput, tamannalu siunnersuutip matuma*



*saqqummiunneqarneranut ilutigitillugu saqqummiunneqarnissaa naatsorsuutigineqarpoq, tassani § 32-imi immikkoortoq 4 nutaaq ilanngunneqassalluni, meeqqanut eqqartuussissut tunngavigalugu eqqartuussiviulluunniit aalajangerneratigut ulloq unnuarlu paaqqinnittarfimmut inissinneqarsimasunut, Meeqqat taperserneqarnissaannut Inatsisartut inatsisaat § 36, imm. 2 naapertorlugu ulloq unnuarlu paaqqinniffimmi, matumani angerlarsimaffimmi isumannaallisakkanik immikkoortortalinnut inissinneqarsimasut ilanngullugit, tikeraarluni angalasinnaatitaanerit atuutissanngitsoq siunnersuummi matumanisut assinganik ersarissarneqarluni.*

## **Qeqqata Kommunia**

” Qeqqata Kommuniata siullertut Naalakkersuisut sakkortuumik kaammattorusuppaat kommunit Naalakkersuisullu akornanni isumaqatigiissutigineqarsimasoq, minnerpaamik sapaatit akunneri tallimat sulinnigiffeqarfiit avataatigut tusarniaanerit ingerlanneqartarnissaat maleqqullugit.”

*Akissut: Kanukokap Naalakkersuisullu akornanni tusarniaanermut isumaqatigiissut 20. maaji 2010-meersoq, tusarniaanerit sapaatit akunnerinik tallimanik piffissalerlugit juulillu qaammataata tusarniaaffiunnginneranik piumasagaatit allassimaffigisaat, Kanukokap ulloq 31. juuli 2018 atorunnaarsinneqarmat atorunnaarpoq. Kommunit tusarniarneqarnerannut tunngatillugu taamaalilluni immikkut malittarisassaqaqarunnaarpoq.*

*Inatsisitigut maleruagassanik, kunngip akuerisaanik, nassuiaatinik il.il. illup iluani avammullu tusarniaanermut najoqqutassat 27. novembari 2019-imeersoq Naalakkersuisut Siulittaasuata Naalakkersuisoqarfiani Inatsiseqarnermut immikkoortortamit suliarineqartut malillugit allassimavoq, nalinginnaasumik tusarniaaneq sapaatit akunnerinik sisamanik sivisussuseqartoq ukiullu qaammataani aqqaneq marlunni tusarniaasoqarsinnaasoq. Siunnersuutip tusarniaassutigineqarnera najoqqutassanik atuuttunik naammassinnittutut taamaamat isigineqarpoq.*

Qeqqata Kommuniatali iluarisimaarpaa inuit innarluutillit najugaqatigiiffimmi, najugaqarfimmi nakkutigineqartumi imaluunniit ulloq unnuarlu neqeroorummi illoqarfigisami nunaqarfigisamiluunniit avataani najugalinnut, ukiumoortumik akiliunneqarlutik angerlarsimaffigisamut tikeraarnissamut malittarisassat Naalakkersuisut ersarissarmatigut. Matumani ersarissarneqarmat Kalaallit Nunaanni pinerluttulerinermut inatsimmi kapitali 33 naapertorlugu meeraq inersimasorluunniit innarluutilik, eqqartuussinikkut eqqartuussiviulluunniit aalajangerneratigut ulloq unnuarlu neqeroorummiittussanngortinneqarsimappat, akiliunneqarluni angalasarneq pineqartunut atortinneqassanngimmat.

Qeqqata Kommuniani misilittagarineqarpoq inuit innarluutillit pillugit inatsimmi §51 naapertorlugu ulloq unnuarlu neqeroorummi najugaqartut, najugarisaminut tikeraaraangamik pissusitoqqanut utersaartoorsinnaasernerat. Taamaattumik kommunita inatsimmut allannguutissamut siunnersuut matumani pineqartoq pissusissamisoortutut isigaa.

Kommunip toqqissisimanartippaa inuit innarluutillit pinerlussimatillugit inuunermi inissisimanerat pillugu eqqartuussiviup, tusarniaaqaartarnera kommunip sullissisuiut. Taamatuttaaq kommunip qujamasuutigaa inummik innarluutilimmik isumannaallisaaviumut ulloq unnuarlun neqeroorummik inissiisoqartinnagu kommunimi sullissisut iliuuseqarnissaanik periarfissiisoqartarmat. Taamaattorli Qeqqata Kommuniata sakkortuumik kaammattorusuppaa Naalakkersuisut kommunillu isumaqatigiissutaat naapertorlugu tusarniaanerit minnerpaamik sapaatit akunnerinik tallimanik sulinnngiffeqarfii ilanngunnagit sivissusilimmik”

*Akissut: Tusarniaanermut akissummik ilanngussamullu nassiinneqarsimasumut naalakkersuisoqarfik qujavoq.*

### **Meeqqat illersuisuat/MIO**

Meeqqat illersuisuata ”Inuit innarluutillit tapersorneqarnissaannut Inatsisartut inatsisaannut allannguutissatut siunnersuut (inuit innarluutillit eqqartuussutikkut eqqartuussiviulluunniit aalajangeratigit inissinneqarsimasut tikeraarlutik angalanerat)” pillugu tusarniaaneq ulloq 7. decembari 2020 tiguaa.

Meeqqat illersuisuata tusarniaanermut oqaaseqarnissamut periarfissinneqarnini qujassutigaa.

Meeqqat illersuisuata tusarniaaneq Naalagaaffiit Peqatigiit Meeqqat pisinnaatitaaffii pillugit Isumaqatigiissutaat, pingaartumik artikeli 3 aamma artikeli 37, aallaavigalugit meeqqat inuusuttullu isaannit nalilerpaa:

#### **Artikeli 3**

**Meeqqat pillugit aalajangiinerit tamarmik, qanorluunniit pisortani namminersortuniluunniit isumaginninnikkut atugarissaarnermik suliaqartuni, eqqartuussivinni, ingerlatsinerimik oqartussani inatsisiliortuniluunniit ingerlanneqaraluarpata meeqqap pisariaqartitai salliunneqassapput.**

#### **Artikeli 37 (c)**

**Naalagaaffiit peqataasut qulakkiissavaat: (...)**

**meeqqat kiffaanngissusiigaasimasut tamarmik inuppalaartumik pineqassammata inuullu pissusissamisoortumik ataqqinassusaa ukiumikkullu pisariaqartitaat eqqarsaatigalugit pineqassallutik. Meeqqat kiffaanngissusiigaasimasut tamarmik pingaartumik inersimasunit avissaaqqatinnegassapput, taamannak avissaartinneqarneq meeqqap pisariaqartitaanut naapertuutissappat, ilaquttaminullu attaveqarnerminik allakkatigit pulaarnikkullu attassisinnaatitaassaaq, pissutsit immikkuullarilluinnarsimangippata;**

Tikeraarluni angalasinnaatitaanerup inunnut innarluutilinnut 18-it sinnerlugit ukiulinnut

meeqqanullu innarluutilinnut eqqartuussut tunngavigalugu eqqartuussiviulluunniit aalajangerneratigut Kalaallit Nunaanni ulloq unnuarlu neqeroorummut inissinneqarsimasunut atuutissannginnerata siunnersuummi ersarissarneqarnissaa siunertarineqarpoq. Sinnersuummi matumani inuit taakku taamaallaat akornuserneqarput. Inuit innarluutillit 18-it sinnerlugit ukiullit meeqqallu innarluutillit inunnut innarluutilinnut inatsit naapertorlugu ulloq unnuarlu neqeroorummut kommunalbestyrelsimit innersuunneqarsimasut tikeraarlutik angalasinnaanerat taamaammatt ullumitut attatiinnarneqassaaq.

### **Nalinginnaasumik oqaaseqaat**

Meeqqat illersuisuata Isumaginninnermut, Ilaqutariinnut Inatsisinillu Atuutsitsinnermut Naalakkersuisoqarfik ulloq 10. decembari 2020 saaffigaa erseqqissaanissamat tunngavilersuut ujartorlugu, tamanna tusarniaanermut atortuni allassimanngimmat.

Meeqqat illersuisuat tunngavilersuummut ersarissaavigineqarsimavoq oqaaseqarnissamullu ilassutissaqarani.”

*Akissut: Tusarniaanermut akissummut nassiunneqartumut naalakkersuisoqarfik aallarniutitut qujarusuppoq.*

*Meeqqat illersuisuat ulloq 10. decembari 2020 imaattumik saaffiginnissuteqarpoq: “Meeqqat tapersorsorneqarnissaannut Inatsisartut inatsisaanni § 32-p aamma Inuit innarluutillit tapersorsorneqarnissaannut Inatsisartut inatsisaanni § 55-ip ersarissarneqarnissaannut tunngatillugu tusarniaassutinut marlunnut ulloq 4. januaari 2021 killilerneqarsimasunut qujanaq.*

*Tikeraarluni angalasinnaatitaanerup meeqqanut eqqartuussut tunngavigalugu eqqartuussiviulluunniit aalajangerneratigut Kalaallit Nunaanni ulloq unnuarlu paaqqinniffimmut inissinneqarsimasunut atuutissannginneranut tunngavilersuut tamanna tusarniaassutinut atortuni ersarissumik atuarneqarsinnaanngimmat tunngavilersuutip ersarissarnissaanut ikiuussinnaavit?”*

*Naalakkersuisoqarfik tassunga atatillugu imannak akissuteqarpoq:*

*”Inuup tapersorsorneqarnissamat pisariaqartitai nassuiarlugit ataasiakkaanut iliuusissatut pilersaarut tunuliaqutaralugu tapersorsorneqarnissamik kommunalbestyrelsip aalajangernerata tunngavigalugu ulloq unnuarlu neqeroorummiinnissamat neqeroorteqartoqarnissaa Inuit innarluutillit pillugit inatsimmut tunngatillugu eqqarsaataavoq.*

*Inuk innarluutilik, tassunga ilanngullugit meeqqat inersimasullu, najugaqarfigisaata avataani inissittariaqarsimatillugu, inuit pineqartut taakku najugaqarfimminnut attaveqarnerat attanniarlugu tikeraarnissamat akiliunneqarlutik angalasinnaatitaassapput.*

*Aammalu inuit eqqartuussut tunngavigalugu eqqartuussiviulluunniit aalajangerneratigut pinerluuteqarsimasunut inissiisarfirmmut taarsiullugu ulloq unnuarlu neqeroorummut*

*inissinneqarsimasut, taamaammallu anisinnaatitaasariaqartut, tikeraarlutik angalasinnaatitaanissaat siunertaasimannngisaannarpoq.*

*Taamaattorli Inuit innarluutillit pillugit inatsimmi §§ 54-imi aamma 55-imi allassimavoq, tikeraarluni angalasinnaatitaanermut piumasaqaataasoq inuk najugaqaqatigiiffimmiissasoq, takuuk § 13, illersugaasumi najugaqassasoq, takuuk § 14, imaluunniit ulloq unnuarlu neqeroorummiissasoq, takuuk § 18, taassumalu najugaqarfissatut neqeroorutip inuup nunagisaata avataaniissasoq.*

*Inuit innarluutillit pillugit inatsimmi § 51-imi aamma allassimavoq, Kalaallit Nunaanni Pinerluttulerinermut Inatsimmi kapitali 32 aamma 33 naapertorlugu eqqartuussivik pineqaatissiinissamik aalajangersimappat inuit innarluutillit Kalaallit Nunaanni ulloq unnuarlu neqeroorummut matoqqasumut inissinneqarsinnaasut.*

*Ulloq unnuarlu neqeroorut aamma ulloq unnuarlu neqeroorut matoqqasoq toqqaannartumik inuit innarluutillit pillugit inatsimmi § 18-imi taaneqarmata, inuit Kalaallit Nunaanni ulloq unnuarlu neqeroorummiittut, qanorluunniit kommunalbestyrelsimit neqeroorut tunngavigalugu imaluunniit eqqartuussut tunngavigalugu eqqartuussiviulluunniit aalajangerneratigut inissiisoqarsimappat, inatsisip paasineqarsinnaanera naapertorlugu tamarmik tikeraarnissamut akiliunneqarlutik angalasinnaatitaapput.*

*Tamannali siunertaasimannngisaannarpoq, taamaammallu inersimasunut aamma meeqqanut/inuusuttunut pillaatissinneqarnissamut ukioritinneqartut ammut killingat sinnerlugit ukiulinnut atuuttumik tamanna inatsimmi tikeraarluni angalanernut aalajangersakkani ersarissumik paasinartumillu allanneqarpoq.*

*Meeqqat tapersorsorneqarnissaannut Inatsisartut inatsisaannik allannguinnermi eqqarsartaaseq aamma taanna atuuppoq, eqqarsaat tassaajuarsimavoq tikeraarluni angalasinnaatitaanerit kommunalbestyrelsip aalajangernerera naapertorlugu meeqqanut nunagisap avataani ulloq unnuarlu paaqqinniffinnut inissinneqarsimasunoortuusut, matumanilu eqqartuussut eqqartuussiviulluunniit aalajangernerera tunngavigineqanngilaq.”*

## **KNIPK**

“Isumaginninnermut, Ilaqutariinnut Atuutsitsinnermut Naalakkersuisoqarfiup ”uunga siunnersuummut” Inatsisartut inatsisaata allanngortinneqarnera pillugu tusarniummut KNIPK imatut oqaaseqassaaq.

**2.** Inatsimmi § 54 imm.5 nutaatut ilanngunneqartussaq imm.6. imm. 1-4 malillugu tikeraarluni angalasinnaatitaaneq atuutinngilaq inuk innarluuteqartoq eqqartuussinikkut eqqartuussiviulluunniit aalajangerneratigut ulloq unnuarlu neqeroorummi najugaqartinneqassappat.

**3.** § 55-imi imm. 5-ip kingorna immikkoortoq nutaaq ilanngunneqassaaq: Imm. 6. imm. 1-4 malillugu tikeraarluni angalasinnaatitaaneq atuutinngilaq meeraq innarluuteqartoq

eqqartuussiviulluunniit aalajangereratigut ulloq unnuarlu neqeroorummi najugaqartinneqarpat.

Allannguutissatut siunnersuutit KNIPK-p taperserlugit nalunaarutigissavaa.”

*Akissut: Tusarniaanermut akissummut nassiunneqarsimasumut naalakkersuisoqarfik qujavoq.*

### **Inuit pisinnaatitaaffiit Instituti**

Ulloq 8. decembari 2020 Isumaginninnermut, Ilaqutariinnut Inatsisinillu Atuutsitsinnermut Naalakkersuisoqarfik Inuit pisinnaatitaaffiit Insitutimut Inuit innarluutillit tapersersorneqarnissaannut Inatsisartut inatsisaata allangortinneqarnissaa pillugu Inatsisartut inatsisissaattut siunnersuummut (inuit innarluutillit eqqartuussut tunngavigalugu eqqartuussiviulluunniit aalajangeereerneratigut inissinneqarsimasut tikeraarlutik angalanerat) oqaaseqaataasinnaasunik noqqaassuteqarpoq.

Instituti siunnersuummut oqaaseqaatissaqanngilaq.

*Akissut: Tusarniaanermut akissummut nassiunneqarsimasumut naalakkersuisoqarfik qujavoq.*

### **Sulisitsisut**

Allannguutissatut siunnersuut qulaani taaneqartoq innersuussutigalugu Sulisitsisut matumuuna nalunaarutigissavaat allannguutissatut siunnersuummut Sulisitsisut oqaaseqaatissaqanngimmata.

*Akissut: Tusarniaanermut akissummut nassiunneqarsimasumut naalakkersuisoqarfik qujavoq.*

### **Kalaallit Nunaanni Politiit**

Tusarniaammut atortunut nassiussanut Kalaallit Nunaanni Politiit oqaaseqaatissaqanngillat.

*Akissut: Tusarniaanermut akissummut nassiunneqarsimasumut naalakkersuisoqarfik qujavoq.*